

COMUNICATO n. 3328 del 27/11/2024

Traduzione in ladino

La 39esima Conferenza de la Mendranzes linguistiches reta dal assessor Marchiori

[Ladino] En mercol ai 20 de november dadoman, te Sala Trentino, aló da la senta de Piazza Dante, l'é stat la 39^a Conferenza de la mendranzes linguistiches, reta dal assessor provinzièl a la politiches per la cèsa, patrimoniè, demanie e promoziòn de la cognoscenza de l'Autonomia Simone Marchiori, dessema co la sorastanta del Servije mendranzes linguistiches e relaziòn esternes Elisabetta Sovilla. À tout pèrt a na vida digitèla enche l'assessor regionèl Luca Guglielmi e sacotenc raprezentanc de la comunitàdes de la mendranzes storiches ladina, mochena e zimbra, anter chisc amministradores locai, membres del Cda di Istituc culturai e l'Autoritàdes per la mendranzes linguistiches.

Marchiori l'à reingrazià duc chi che à tout pèrt per sie contribut per la soravèrda e promoziòn de la mendranzes linguistiches e l'à recordà la scontrèda del Consei provinzièl stata la dì inant, reta scialdi dal assessor medemo su encèria del president Fugatti, dintornvia i deric de la mendranzes. “De fat chesta Conferenza l'é na continuaziòn de la scontrèda de angern”, l'à dit, col rercordèr la aziòn de la Jonta provinzièla per la zones olache vif la mendranzes linguistiches e che les cogn ge fèr front ai problemes de la arees da mont.

Se à donca scomenzà a rejonèr del argument al orden del dì, en cont del servije de trasmiscion di canai austriaches Orf 1 e Orf Sport sui teritories de la mendranzes linguistiches, ma enche sun dut l'teritorie provinzièl, per chel che se va envers n miorament de la cantità e de la calità de la difuzion, che se perveit de meter a jir prest, che jirà a corir zones no toutes ite te la pruma ipotesa, desche l'area Lenzi te la Val di Mochegn.

“Se trata de na oportunità per duc i sentadins de la Provincia, che i arà l met de scutèr e se confrontèr con n lengaz a nos vejìn e per la mendranzes germanofones l met de aer trasmiscions televijives tel lengaz de referiment: una scomenzadiva emportanta te chela che la Provincia creit dassen”, l'à dit amò Marchiori.

Enche Sovilla l'à sotriassà che se trata de “N projet che raprezentea n vèrech emportant per na aziòn per se arvejinèr ai lengac, en generèl de plurilinguism e donca de na dimenscion te chela che la mendranzes te nosc teritorie à na funziòn de gran emportanza”, col recordèr che chest projet l se basa sul miorament de la calità tecnica de la trasmiscions Orf. Con chesta scontrèda l'é stat confermà donca la neva specifiches tecniches e de contrat e l enteres per meter a jir l servije per i doi egn che vegn.

Fenì su de rejonèr en cont de chest l'é stat dit fora l apuntamento che vegn de la Conferenza pervedù per de jené del 2025, te chel che vegnarà fat fora la spartijon del Fon provinzièl per la mendranzes e la politiches de intervent per l stravardament e la promoziòn de la mendranzes medemes.

Traduzion di Servijes Linguistics e Culturèi del Comun general de Fascia

(cdt)